

**Pigisanik aalaakkaasunik piginnaatitaaffimmik pisisarnej imaluunniit
atuisinnaatitaaneq pillugu Inatsisartut inatsisissaattut siunnersuut**
*Ineqarnermut, Attaveqaasersuutitut Isorliunerusunullu Naalakkersuisumit
saqqummiunneqartog*

pillugu

Inatsisinut Ataatsimiititaliap

siunnersuutip pingajussaaneerneqarneranut

ILASSUTITUT ISUMALIUTISSIISUTAA

Ataatsimiititaliap suliarinninnermini ilaasortarai:

Inatsisartunut ilaasortaq Aqqalu C. Jerimiassen, Atassut, siulittaasoq
Inatsisartunut ilaasortaq Kuno Fencker, Naleraq, siulittaasup tullia
Inatsisartunut ilaasortaq Pipaluk Olsen, Demokraatit
Inatsisartunut ilaasortaq Iddimanngiiu Bianco, Inuit Ataqatigiit
Inatsisartunut ilaasortaq Anders Olsen, Siumut

UKA2025-mi ulloq 4. november 2025 aappassaaneerinninnerup kingorna ataatsimiititaliap
siunnersuut misissorpaa.

Siunnersuutip imarisaa siunertaalu

Siunnersuutip imarisaanut siunertaanullu tunngatillugu siunnersuutip aappassaaneerneqarnissaanut ataatsimiititaliap isumaliutissiissutaa innersuussutigineqarpoq.

Siunnersuutip Inatsisartunit aappassaaneerneqarnera

Siunnersuutip siunertarisaa ataatsimut isigalugu isumaqatigineqarpoq.

Siunnersuulli inatsisini allani, assersuutigalugu takornariartunut kiffartuussinermik ingerlatsinissamut akuersissuteqartarnek pillugu Inatsisartut inatsisaanni Kalaallit Nunaanni inunnik nalunaarsuisarfimmi ukiut tallimat sioqqullugit najugaqartutut nalunaarsorsimanissamik piumasaqarfiusumi, piumasaqaataasunut naammattumik assingunnginnera ernummatigineqartoq oqaatigineqarpoq. Inatsisissatut siunnersuummi matumani pineqartumi Kalaallit Nunaanni inunnik nalunaarsuisarfimmi ukiut marluk amerlanerilluunniit sioqqullugit najugaqartutut nalunaarsorsimanissamik piumasaqaateqarnissaq siunnersuutigineqarpoq.

Kiisalu danskisut innuttaassusillit Kalaallit Nunaannut attuumassutillit aammalu danskisut innuttaassusillit Kalaallit Nunaannut attuumassuteqanngitsut inatsisissatut siunnersuummi immikkoortinneqannginnerat ernummatigineqartoq aammaarluni oqaatigineqarpoq.

Taamatuttaaq immikkut akuersissuteqarnissamut piumasaqaatit suut naammassineqarsimassanersut inatsisissatut siunnersuummut tassungaluunniit nassuiaatini allaaserineqarsimannginnerat ernummatigineqartoq oqaatigineqarpoq. Tamatumani ernummatigineqarpoq tamanna qinnuteqaatit suliarineqarneranni assigiinngisitsinermik pilersitsisinnaanersoq.

Innuttaassuseqarneq pillugu apeqqut siunnersuutip matumani pineqartup avataatigut immikkut oqallisigineqartariaqartoq oqaatigineqarpoq.

Tamakku tunngavigalugit siunnersuut ataatsimiititaliamit suliarineqartussanngorlugu innersuuteqqinneqarpoq.

Ataatsimiititaliap siunnersuummut oqaaseqaatai

Siunnersuut tapersorsorluarneqarmat ataatsimiititaliamit oqaatigineqassaaq. Kiisalu siunnersuutip Inatsisartunit tamarmiusunit tunuliaqutserneqarnissaa Naalakkersuisut kissaatiginartinneqartoq, tamannalu tunngavigalugu assersuutigalugu inunnut danskisut innuttaassuseqanngitsunut qanoq sivisutigisumik najugaqarnissamik piumasaqaatip sivitsorneratigut Naalakkersuisut naaperiaarusussuseqartut Naalakkersuisunit

oqaatigineqarmat ataatsimiititaliamit maluginiarneqarpoq.

Immikkut ittumik akuersissuteqarnissamut piumasaqaatit sorliit naammassineqarsimanissaasa allassimannginnerat pillugu ataatsimiititaliamit oqaatigineqassaaq inatsisissatut siunnersuummut nassuiaatini oqaatigineqarmat Kalaallit Nunaanni pigisanik aalaakkaasunik piginnaatitaaffimmik pisinissamik qinnuteqaatinik Naalakkersuisut suliarinninnissaannut aalajangiinnissaannullu tunngatillugu piumasaqaatinik erseqqinnerusunik siunnersuummi allassimasoqanngimmat.

Taamaattorli inatsisissatut siunnersuummut nassuiaatini imaattunik allassimasoqarpoq:

"Pigisamik aalaakkaasumik pisinissamut siunertaasoq, aningaasaqarnikkut sunniutaasussat aammalu najukkami pigisanut niuerfimmi sunniinissaq, nalinginnaasumik nalilersorneqartarput. Nalinginnaasumik niuernikkut ingerlatsinissakkullu naliliisoqarnersoq, pigisamik aalaakkaasumik pigisaqalernissamut akuersissummik qinnuteqaammut tunngavissiisinnaasumik, ilaatinneqassaaq.

Pigisamik aalaakkaasumik nutaamik sanaartormermik kinguneqartussamik qinnuteqarnermi, suliassaq najukkami suliffeqarnermut, illuliornermik inuussutissarsiornermi pisinnaasanik atorluaasoqassanersoq kiisalu pigisamik aalaakkaasumik sanaartormermut akigititat, suliassamut qanoq sunniuteqarsinnaanersut, toqartussaanersoq Naalakkersuisut naliliinerani aammattaq ilaatinneqarsinnaapput.

Aamma Naalakkersuisut allaffissornikkut sulinerminni Kalaallit Nunaata naalagaaffeqatigiinnerup iluani suleqatigiinnerit, nunat akornanni innuttaasut suleqatigiinneri, kiisalu nunani tamalaani pisussaaffiit, taamatullu Kalaallit Nunaanni nunami namminermi aningaasaqarnikkut nunamilu pilersaarusiornikkut soqutigisat eqqarsaatigineqarnissaat pingaartissinnaavaat."

Aalajangiineq allaffissornikkut naliliineq tunngavigalugu pisimappat tunngavilersuummi pingaarnertut isiginiakkat naliliinermi aalajangiisuusimasut ilaatigut ingerlatsinermik inatsisit malillugit allassimassammata ataatsimiititaliamit oqaatigineqassaaq.

Kiisalu ataatsimiititaliamit aamma oqaatigineqassaaq inatsisini arlalinni amerlasuunik aalajangersagaqarmat ingerlatsivik nammineq naliliisussanngortinneqarluni, tamannalu pitsaaqutaasinnaavoq, tassami naliliinissamik killilersuinikkut ataasiakkaanik isiginnissinnaanermut periarfissaq killilerneqartarmat. Akerlianik naliliinissamut malittarisassiorneq iluaqutitaqarsinnaavoq, taamaaliornikkummi ingerlatsiviup aalajangiinnissaa ajornannginnerulerlunilu nukissanik atuinikinneruffiussammat.

Tamanna tunngavigalugu immikkut ittumik akuersissuteqarnissamut piumasaqaatinik

erseqqinnerusunik aalajangersaasoqarnissaanik pisariaqartitsisoqarnersoq ataatsimiititaliamit oqaluuserineqarpoq.

Ilaatigut inissianik iluanaarniutigalugu pisiortortoqarnissaata pinngitsoortinneqarnissaa siunnersuummi ilaatigut siunertarineqartoq ataatsimiititaliamit oqaatigineqassaaq, taamaattumillu inuit aammalu inatsisitigut inuttut isigineqarsinnaasut sorliit Kalaallit Nunaanni pigisanik aalaakkaasunik piginnaatitaaffimmik pisisinnaatitaanerannut kiisalu nunaminertanik atuisinnaatitaanerannut siunnersuutikkut malittarisassat arlallit aalajangersarneqarput. Inuit danskisut innuttaassusillit aammalu ingerlatseqatigiiffiit taakkunannga tamakkiisumik pigineqartut pigisanik aalaakkaasunik il.il. killilersuinertaqanngitsumik pisisinnaanissaat tassani siunnersuutigineqarpoq.

Allatut oqaatigalugu danskisut innuttaassusillit Kalaallit Nunaannut attuumassutillit aammalu danskisut innuttaassusillit Kalaallit Nunaannut attuumassuteqanngitsut siunnersuummi immikkoortinneqanngillat.

Kiisalu assersuutigalugu sanaartornermut il.il. aningaasaleerusuttut pisariaqartinneqartut aningaasaliinissamut kajumissuseqaannarnissaat siunnersuutikkut aamma siunertarineqartoq ataatsimiititaliamit maluginiarneqarpoq. Tamatumani imaassinnaavoq aningaasat pisariaqartinneqartut nunatsinni maannangaaq pigineqanngitsut, taamaattumillu pisut ilaanni nunanit allanit aningaasaliisoqarnissaa pisariaqartinneqarsinnaalluni.

Ataatsimiititaliap inassuteqaatai

- Ataatsimiititaliami amerlanerussuteqartut Demokraatineersut, Inuit Ataqtigiinneersut, Siumumeersut Atassummeersullu siunnersuutip **akuersissutigineqarnissaa** inassutigaat.
- Ataatsimiititaliami ikinnerussuteqartup Siumumeersup **kaammattuut** imaattoq saqqummiuppaa:

“Uumap inatsisip atuutilersinneqarnerata malitsigisaanik ataatsimiisitaliami amerlanerussuteqartut kaammattuutigissavaat Naalakkersuisut ukua pillugit ersarissanissaq sulissutigineqassasoq:

1. *Innuttaassuseqarneq pillugu apeqquut immikkut qulequttatut, oqartussaaffigileernissanullu apeqquut immikkut Inatsisartigoorlu sammeqqinneqassasoq.*
2. *Inatsimmi paragraf 4 allassimasoq tassa maani nunami ukiuni marlunni najugaqarsimanissamik akileraartartuusimanissamillu piumasaqaat tunngavigalugu, siunissami aggersumi inatsisinut allanut assingusumik aaqqiissuteqarnissaq sulissutigineqassasoq. Tasamaasilluni ukiuni tallimani*

*nunatsinni najugaqarlunilu akileraartartuusimanissamik piumasaqaat
aallaavigineqalernissaa siunertaralugu.”*

Ataatsimiititaliap taama oqaaseqaateqarluni isumaliutissiisummilu allassimasutut paasinnil-
luni siunnersuut aappassaaniigassanngortippaa.

Aqqalu C. Jerimiassen
Siulittaasoq

Kuno Fencker
Siulittaasup tullia

Pipaluk Olsen

Iddimanngiiu Bianco

Anders Olsen